

Pidemöö

ingante Pabodo cadota ante nänö yewæmongainta

Pidemöö ingante Pabodo yewæmongampa

¹Botö Pabodobo inömo inte Itota Codito ingantedö ante apænebo beyænque botö imote tee mönedäni tee mönegaïmo imopa. Mönö töninacä Tímoteo tönö yewæmömönapa. Pidemöö möna në waadebi inömi inte mönatö tönö godongämæ cædömi iñömite mönatö, Bitö acæbiimpa, ante yewæmömönapa. ²Bitö oncönë iñömö Itota Codito ingante mïni pönencabo godongämæ pönöminite mönatö mïnitö iminite adobaï yewæmömöna acæminimpa. Ayæ mönö mængä Apia tönö Adoquipo mönitö tönö godongämæ në tontado baï cædongä tönö tömëna acædaïmpa, ante yewæmömönapa. ³Mönö Mæmpo Wængonguï tönö Awënë Itota Codito tönö godongämæ waadete pönö cæda ate mïnitö gänë entawencæminimpa, ämönapa.

Pidemöö në waadete pönengä inte wede pönengä ingä

⁴⁻⁵Bitö Awënë Itota ingante wede pönëmi imipa, ante tömengä quïnäni inönäni inänite waadete pönëmi imipa, ante bitö imitedö ante änäni ëñënimö inte botö bitö beyæ ante Wængonguï ingante botö apæneyedë adocä ingante cöwë waa ate pönente apænebopa. ⁶Mäninö Itota Codito ingante bitö wede pönëno ante wadäni inänite cöwë apænebi ëñëninque tömënäni, Mönö tömengä waa pönï nänö entawënoncoo incæ quincodö entawëmö imöö, ante

ædæmö ëñente bacædänimpa, ante nanguï cæcæbiimpa, ante botö bitö beyæ ante Wængonguï ingante apænebopa. ⁷Botö töninabi ëñëmi. Itota Codito quïnäni inönäni inänite bitö waadete pönente cæbi ate tömënäni gançæ entawente todänitapa, ante apænedäni ëñëninque botö nanguï watapæ todinque wampo pönentabopa.

Pabodo Önetimo beyæ ante Pidemöö ingante angampa

⁸Mänömaï beyæ mönö Awënë Codito botö imote angä ëñëninque botö awënë baï äninque bitö cæquënenö ante, Iïmaï cæe, ante guïñënamai inte bitö imite wææ ämo baï waa incædönimpa. ⁹Incæte botö wææ änämaï inte wæætë mönö waadete pönëmämo beyænque ædæmö apænebopa. Botö Pabodobo inömo inte në picæmo imopa. Ayæ ñowo botö Itota Codito ingantedö ante apænebo beyænque botö imote tee mönedäni tee mönegaïmo inte ämopa. ¹⁰Ïninque botö wengä onguïñængä Önetimo beyæ ante bitö imite ædæmö apænebopa. Edæ tee mönecönë botö quëwëñedë Önetimo ingante apænebo ëñëninque tömengä në pönengä badinque botö wengä baï bacä æntabopa cæbii.

¹¹Wëenëñedë tömengä bitö beyæ waa cædämaï inte önonque quëwengacäïmpa. Incæte tömengä ñowo iñömö bitö beyæ incæ botö beyæ incæ në waa cæcä bacäïmpa. ¹²Tömengä botö në waadecä ingä incæte tömengä ingante botö bitö weca ocæ ëmænte da godömo

poncæcäimpa. ¹³Itota ingantedö ante mönö watapæ apænedö beyænque botö imote tee mönedäni ongöningue botö, Pidemöö dæ äñonte Önetimo iñömö tömengä beyæ botö weca ongöningue botö tönö guëa cæcæcäimpa, ante pönëningue ainentabopa. ¹⁴Incæte æbämenque pönö waa cæbi incæ wii botö wææ änö beyænque cæcæbiimpa. Wæætë tömëmique pönente cæcæbiimpa, ante cætabopa. Bitö ëñënamai inte Ao änamai iñömite botö ædö cæte Önetimo ingante, Bitö botö weca ongoncæbiimpa, ante anguiimoo. ¹⁵Önetimo bitö imite wantæyö wodii godingä inte ñowo adodö pöñongante bitö tömengä ingante wæætë æñömi tömengä cöwë bitö tönö quëwencæcäimpa. Wabänö manii ante beyænque wantæyö wodii gocantawo. ¹⁶Tömengä ingante bitö godonte ænte mämi ate tömengä bitö beyænque cæte nê quëwëningä ingä incæte tömengä ñowo wii nê cæte quëwënanique bai inongä ingampa. Wæætë edæ Itota Codito ingante pönëngä badinque tömengä ñowo godömenque bitö töninäcä inongä inte bitö nê waadecä ingampa. Edæ tömengä botö nê nangui waadecä ingampa. Ayæ wii bitö nê cædonganque inongä inte tömengä wæætë mönö Awënë quingä ingampa. Mänömai beyæ tömengä godömenque bitö nê waadecä inongä ingampa.

¹⁷Ïninqe bitö, Pabodo tönö guëa cæmöna imónapa, ante pönëmi ïninqe bitö botö imote æmi bai Önetimo ingante adobai æmaimipa. ¹⁸Bitö imite wënæ wënæ cæcantawo. Bitö ïmi quiëmë ante æninqe wæætë pönönämai ingantawo. Ïninqe tömengä nänö pönönämai ininö ante bitö botö imote wæætë, Pönömi æmoe, ämi ëñëningue botö pædæ pönömo æmaimipa. ¹⁹Botö Pabodobo inömo inte tömëmo önopoca inte imainö ante yewæmömopa. Tömengä quinö

nänö pönönämai ininö ante botö wæætë tömänö pönömo æncæbiimpa. Botö edæ bitö imite wii Itota Codito ingantedö ante odömonte apænebo bai bitö ayæ pönönämai inte quëwencædömiimpa. Ïninqe botö apænedö beyæ bitö botö imote wæætë pönönämai ingä bai inömi imipa. Incæte botö mänömai beyæ bitö imite wii ancæboimpa. ²⁰Botö töninäbi ëñëmi. Mönö Awënë beyænque bitö botö beyæ pönö cædinque Önetimo ingante waadete pönencæbiimpa, ante wæbopa. Edæ mönö Codito nempo quëwëmöna ïninqe bitö waadete pönente cæbi ate botö gançæ entawente tocæboimpa, ämopa.

²¹Bitö cöwë ëñente cæquimi imipa, ante do ëñënimö inte botö, Bitö acæbiimpa, ante yewæmömopa. Edæ botö änö ëñente cædinque bitö godömenque cæquimi imipa, ante ëñëmopa. ²²Ïninqe adodeque ayæ äinëmopa. Minitö botö beyæ ante Wængongui ingante mini apænedö beyæ botö imote ñimpo cædäni ate bitö weca acæ poncæboimpa, ante pönëmopa. Ïninqe bitö oncönë adocönë botö owoquincö ante tömäa ædæmö cö cæquimi, ämopa.

Pidemöö ingante Pabodo, Waa quëwencæbiimpa, angä

²³Epapada botö bai adobai Itota Codito beyænque näni nê tee mönegaingä iñömö tömengä botö imote, Pidemöö waa quëwencæcäimpa, ante angä ëñëningue botö bitö imite yewæmömopa. ²⁴Maadoco tönö Aditadoco ayæ Deëma tönö Odoca botö tönö godongämæ cædäni iñömö adobai botö imote, Pidemöö waa quëwencæcäimpa, ante änäni ëñëningue botö bitö imite yewæmömopa.

²⁵Mönö Awënë Itota Codito bitö imite waadete pönö cæcæcäimpa. Mäninqe ante botö yewæmömopa.